

Il Friûl taramotât al à bisugne di ducj, ma al à di aministrâsi di bessôl

No savêš cun ce tante gjonde che o soi culì a celebrâ cun voaltris, parcè che o viôt che o sin rivâts adore, nô insieme cun voaltris, come di plantâ la usance e la custumance di cjatâsi une volte ad an in cheste glesie par dî lis nestrìs robìs culì a Einsiedeln.

* * *

O viodêš che i temis des leturis che o vin fatìs a son za obleâts: il coragjo, il tignê dûr, e parcè che si è puare int no vin di pierdì ni il coragjo ni la fuarce di tignê dûr. Però mi lassais dî chestìs robìs intune maniere un pôc concrete.

Prin di dut, vê il coragjo nol vûl dî no viodi la situazion grave dulà che la nestre int si cjate. Vê coragjo al significhe ancje jessi bogns di dî di no, jessi bogns di capî che ciertìs robìs no van. Chel che nol vûl capî,chel che al reste sentât cence pensâ ce che al vûl dî rindisi cont dai siei fradis, nol è un om di coragjo.

E alore, in plui di ce che si vin dits vuê cuant che si sin cjatâts insieme inte sale, al è alc di dî culì.

Prin di dut al guvier talian o ai bisugne di dî une robe. O ai bisugne di alçâ la vôs, come che le varès alçade in cheste basiliche ancje il vescul di Udin, che fintremai cumò no le à alçade e duncje cualchidun al scugnarà ben alçâle. Che prin di dut, al nestri puar popul furlan taramotât si à di lassâi la robe che al à, e no fâ fente di dâi, dopo di vêi cjolt lis risorsìs che al à. Al è dut dibant cirî di dâi bêçs cuant che no si lassii ce che al à. Cuant che no si lassii, par esempli, lis jentradis che al pues vê cu lis tassis, cuant che no si lassii i provents de energjie eletriche, cuant che ce che al à no si lassii e ce che si da nol è reâl, nol è vêr, al va dividût par doi, al va dividût par trê. E je une figure plui bieles di ce che a mertin e che al fâs il guvier se nus lasse ce che o vin, prin di dânus ce che nus spiete.

* * *

Seconde robe che o ai di dîus e je cheste. Il popul furlan al à bisugne di ducj. Al è fals ce che la stampe e ancje la radio a van disint, che nô o fasìn di bessôi. No! O vin bisugne di ducj. Però o vin di aministrâsi di bessôi. Altri, al è vê dibisugne di ducj; altri, al è che a aministrin chei altrìs.

Se inte storie no vin mai vude dibisugne di une autonomie, le vin cumò. Parcè che nol è just che lis cjasis lis fasìn i urbaniscj cemût che ur plâs a lôr. A àn di jessi fatìs cemût che nus plasìn a nô par podê vivi dentri. La ricostruzion o vin di fâle nô; o vin dirit di induvinâle nô; o vin dirit di sbaliâle nô, no chei altrìs. A son dirits naturâi e fundamentâi.

E o crôt ancje che al coventi dî in concret cualchi robe clare e precise. Noaltris o podarìn pensâ di tornâ a jevâ il cjâf dopo une bote di chês che o vin cjapadis ai sîs di Mai di chest an, però o vin bisugne di sintîsi simpri plui di jessi un popul cuntune muse clare. Un popul che no si vise di jessi chei che al è al riscje di jessi dispierdût. La aghe che no je un flum si spiert pe campagne cence non, ma la aghe che e cor intun flum e à un non, e je buine di jessi doprade par fâ dal ben, e je buine di fâ alc, e je une fuarce. La aghe spandude pai prâts e je cence vôs; nissun si inacuarç di jê.

Cussì ancje par nô. Nus covente vê cussience di jessi chei che o sin. E no stait a ve pôre che cheste e sedi supierbie o mancjance di umiltât, come che fals catolics a stant sivilant jù pal Friûl. La supierbie e la mancjance di umiltât a son di chel che al met il pît sul cuel a di

chel altri. E nô, graciant Idu, no lu vin metût a dinissun. Nus al àn metût, tal cors de storie. Nô no sin stâts bogns di doprâ nissun. Al è par chel che o voi indevant, devant de Glesie, devant dal Pari Eterni, cun muse alte e francje, podint preâ in cheste nestre lenghe e par chestis intenzions.

* * *

E lassaitmi dî une altre robe. Il taramot dal sîs di Mai: chel che al dîs che al è stât un cjastî di Diu pai furlans al è un salvadi che i da a Diu colpîs che, se lis à, no lu savîn. Parcè che il cjastî di Diu, se Diu sal riserve, al è par chel altri mont. In chest mont, ogni volte che nus capite une disgracie, no si rive mai adore di savê se e je une fortune o se e je une autentiche disgracie.

Al è par chel che culî o scugnùn ripetisi la peraule dal Signôr. Cjalait. Si rindêso cont che tantis voltis il nestri popul al jere indurmidît e inçussît? Cui à dit che fra dîs agns no podîn plui dî che il taramot nus à dismots e guai se nol jere? Si viodarîm fra dîs agns. Sperîm di cjatâsi insieme in cheste bieles glesies e di podê dîsi insieme che il taramot al à vierte une altre strade, al à dismot il nestri popul, la sô storie e à cjapade une altre plee. Cjalait che Diu al è grant tal fâ dispiets, ma al è ancjetant grant tal jessi bon di fâ nus chei dispiets che nus coventin par dâ di ca.

*Einsiedeln, ai 5 di Setembar dal 1976,
te fieste dal popul furlan*